

四庫全書

史部

欽定四庫全書

欽定續文獻通考卷一百二十五

兵考

禁衛兵

元太祖時以穆呼哩齊拉袞博勒呼博爾濟為四集賽
領集賽台分番宿衛

太祖功臣博勒呼等四人時號都爾本庫魯克猶言
四傑也太祖命其世領集賽之長集賽猶言番直宿

衛也凡宿衛每三日一更申酉戌日博爾濟領為第一集賽即伊克集賽博勒呼早絕太祖命以博索部代之而非四傑功臣之類故以自名領之其云伊克者言天子自領之故也亥子丑日博爾濟領之為第二集賽寅卯辰日穆呼哩領之為第三集賽巳午未日齊拉袞領之為第四集賽齊拉袞後絕其後集賽常以右丞相領之凡集賽長之子孫或由天子所親信或由宰相所薦舉或以其次序所當為即襲其職

以掌環衛雖其官卑勿論也及年勞既久則遂擢為
一品官而四集賽之長天子或又命大臣以總之然
不常設也其他預集賽之職而居禁近者分冠服弓
矢食飲文史車馬廬帳府庫醫藥卜祝之事悉世守
之雖以才能受任使服官政貴盛之極然一日歸至
內庭則執其事如故至於子孫無改非甚親信不得
預也其集賽執事之名則主弓矢鷹隼之事者曰和
爾齊赤實保齊齊哩克昆書聖旨者曰扎拉齊為天子

主文史者曰筆且齊親烹飪以奉上飲食者曰搏囉
齊侍上帶刀及弓矢者曰伊勤都齊庫特齊司閤者
曰巴爾噶齊掌酒者曰達喇齊典車馬者曰烏拉齊
庫哩齊掌內府尚供衣服者曰舒庫爾齊牧駱駝者
曰特默齊牧羊者曰和尼齊捕盜者曰和囉噶齊奏
樂者曰浩爾齊又名忠勇之士曰巴圖爾勇敢無敵
之士曰巴圖其名類蓋不一然皆天子左右服勞侍
從執事之人其分番更直亦如四集賽之制而領於

集賽之長若夫宿衛之士則謂之四集賽台亦以三日分番入衛其初名數甚簡後累增為萬四千人揆之古制猶天子之禁軍是故無事則各執其事以備宿衛禁庭有事則惟天子之所指使比之樞密各衛諸軍為尤親信者也然四集賽台自太祖以後累朝所御鄂爾多其宿衛未嘗廢是故一朝有一朝之集賽總而計之其數滋多每歲所賜鈔幣動以億萬計國家大費每敝於此焉

陶宗儀輟耕錄曰伊勒都齊乃侍御之至親近者
三日一次輪流入直負羅和於肩佩環刀於腰或
二人四人多至八人時若上御控鶴則在墀陛之
下蓋所以虞奸回也雖宰輔之日覲清光然有所
奏請無伊勒都齊在不敢進

世祖時設五衛以象五方始有侍衛親軍之屬置都指
揮使以領之

於是禁兵之設殆不止於前矣而其用非一端用之

於大朝會則謂之圍宿軍用之於大祭祀則謂之儀仗軍車駕巡幸用之則曰扈從軍守護天子之帑藏則曰看守軍或夜以之警非常則為巡邏軍或歲漕至京師用之以彈壓則為鎮遏軍

臣等謹按元代禁衛之兵世祖時其制始備嗣後歷朝各有增損王圻續通考隨時纂列未能清晰今據史志參以紀傳分標諸衛而因革損益之制并載各條之下其通言侍衛而不指明某衛者則

仍按年載於前庶考鏡者不慮其混淆云

世祖中統元年四月徵諸道兵六千五百人赴京師宿衛

至元十四年五月選蒙古漢軍相參備都城內外及萬壽山宿衛

十六年四月勅以上都軍四千衛都城凡他所未戍者皆遣歸

成宗元貞二年二月禁軍將擅易侍衛軍

四年八月詔蒙古侍衛所管特默齊軍人子弟投充諸王位下身役者悉遵世祖成憲發還元役

武宗至大二年十一月尚書省言比年衛士太濫率多無賴請充衛士者必廷見乃聽從之

四年四月

時仁宗已即位

詔分汰宿衛士漢人高麗人南人冒

入者還原籍

仁宗皇慶二年十月勅漢人南人高麗人宿衛分司上都勿給弓矢

四年七月賜衛士錢帛

帝出見衛士有敝衣者問之對曰戍守邊鎮餘十五年以故貧耳帝曰此輩久勞於外留守臣未嘗以聞非朕親見何由知之自今有類此者必言於朕因命賜之錢帛

十一月諭諸宿衛入直各居其次非有旨不得上殿闌入禁中者坐罪

五年二月勅廣寧開元等萬戶府兵入侍衛有兄弟子

姪五人者三人留四人三人者二人留著為籍

七年二月

時英宗已即位

汰富民竄名宿衛者給役蒙古諸驛

定京城環衛更番法准五衛漢軍歲例

英宗至治元年八月東內皇城建宿衛屋二十五楹命五衛內摘軍二百五十人居之

臣等謹按志以此事專為圍宿軍而設

三年二月命宣徽院選蒙古子男四百入宿衛

泰定帝泰定元年七月命東宮衛士仍依舊制

中書省臣言東宮衛士先朝止三千人今增至萬七千人請命詹事院汰去仍依舊制從之

文宗天歷元年十一月命總宿衛官分簡所募勇士非舊嘗宿衛者皆罷去

二年四月四番衛士各分五十人直東宮

四番衛士舊以萬人為率至是增三千人至五月又增千人

至順元年閏七月衛士上都駐冬者所給糧以三分為

率二分給鈔

八月汰宿衛士

省院臺官奏定大內四宿衛每衛不過四百人累朝宿衛各不過二百人鷹坊萬四千二十四人當減四千人內饗九百九十人四集賽當留者各百人累朝舊邸官分饗人三千二百二十四當留者一千一百二十人媵臣齊哩克昆各萬人當留者六千人其汰去者斥歸本部著籍應役有容匿濫充者集賽官與

其長杖五十七犯者與典給散者杖七十七沒家貲之半賞告者令監察御史察之制可

臣等謹按以上諸條內所言宿衛之制疑皆當入圍宿軍條下蓋朝會所用則曰圍宿時時以備役使較之他軍有勞逸之不同也然志中未嘗以為專指圍宿軍而設故亦為分載於前

順帝至正十七年四月監察御史五十九請訓練衛士從之

五十九言今京師周圍雖設二十四營軍卒疲弱素不訓練誠為虛設倘有不測誠可寒心宜速選擇驍勇精銳衛護大駕鎮守京師實當今莫安根本固堅人心之急務帝嘉納之

控鶴軍後升為衛候直都指揮使司

世祖中統二年十二月初設控鶴五百人以劉德為軍使領之後至至元二年裕宗招集控鶴一百三十五人三十一年徽政院增控鶴六十五人立衛候司

領之且掌儀從金銀器物成宗元貞元年皇太后復以晉王校尉一百人隸焉至大德十一年益以懷孟從行控鶴二百人升衛候直都指揮使司武宗至大元年復增控鶴百人總六百人設百戶所六以為其屬仁宗皇慶元年四月簡汰控鶴士還本籍英宗至治三年罷衛候司四年

至治並無四年此志文有誤

以控鶴六百

三十人歸於皇后位下後復置立文宗至順二年六

月免控鶴衛士當驛戶

武衛軍後改侍衛親軍

世祖初有武衛軍中統二年八月諭武衛軍都指揮使李伯祐汰本軍老弱者選精銳代之三年九月以侍衛親軍都指揮使董文炳兼山東路經畧使收集益都舊軍充武衛軍戍南邊又詔益都行省大都督撒吉思與董文炳會議兵民籍每十戶惟取其二充武衛軍其海州東海漣水移入益都亦隸本衛四年正月詔諸翼萬戶簡精兵四千充武衛軍四月選益

都兵千人充武衛軍至元元年改武衛為侍衛親軍
分左右翼置都指揮使是年八月勅山東經畧副使
武秀選益都新軍千人充武衛軍二年十二月增侍
衛親軍一萬人內選女直軍三千高麗軍三千阿哈
三千益都路一千每千人置千戶一員百人置百戶
一員以領之仍選丁力壯銳者應役三年正月選女
直軍二千為侍衛軍五月諭樞密臣曰侍衛親軍非
朕命不得發充夫役修瓊華島士卒即日放還四年

七月僉東京軍千八百人充侍衛軍時諭東京等路
宣撫使命於所管戶內以十等為率於從上第三等
戶僉選千八百名若不敷於第二等戶內僉補仍立
千戶百戶牌子頭并其家屬同赴中都應役

左衛中衛右衛前衛後衛

至元八年七月以侍衛親軍改立左右中三衛親軍
置都指揮使掌宿衛扈從兼屯田國有大事則調度
之十三年六月勅新附三衛兵之老弱者放還其家

至元十六年以侍衛親軍創置前後衛制如上三衛
是年二月增置五衛指揮司二十年十月詔五衛軍
歲以冬十月聽十之五還家備資裝正月番上代其
半還四月畢入役時各衛議先遣七人而以三人自
代從之二十二年二月以應放還五衛軍穿河西務
河舊例五衛軍十人為率七人三人分為二番十月
放七人者還正月復役正月放三人者還四月復役
更休息之二十九年命六衛漢軍勿概供他役

按左
右中

前後為五衛考之兵志以此五衛及武衛列於諸衛之前則此所云六衛當是兼武衛言之而非欽察桂齊諸衛也武衛世祖初即有後改侍衛親軍至至元二十六年又立武衛親軍都指揮是時樞密院所奏已有以六衛六千人雜以他兵總立武衛指揮似武衛又不在六衛之中矣疑改侍衛親軍而武衛之營仍存或以侍衛親軍與五衛軍合稱六衛皆未可考元史志文殊未明晰未可臆斷也時樞密

院臣言六衛內領漢軍萬戶現存者六千戶撥分為三力足備車馬者二千五百戶每甲令備馬十五匹牛車二兩力足備車者五百戶每甲令備牛車三兩其三千戶惟習戰鬪不他役之六千戶外則供他役

庶能各勤乃事而兵亦精銳詔施行之

臣等謹按前因至元八年改立左右中三衛故武衛與侍衛親軍之事載至至元四年七月而止然紀志中於八年而後仍有止言侍衛軍之文想其時雖改置五衛而侍衛親軍之本營未嘗廢也今仍為類載於左

至元十三年四月以侍衛親軍征戍歲久放令還家期六月各歸其軍六月命征東元帥府選襄陽生券

軍五百充侍衛軍十五年五月選江南銳軍為侍衛
親軍時總管胡翔請還侍衛軍先是宿州蘄縣等萬
戶府士卒百人有旨俾充侍衛軍後從僉省嚴忠範
征西川既而嘉定重慶夔府皆下忠範回軍留西道
翔上言從之九月勅以總管張子良所匿軍二千二

百人充侍衛軍士俾張亨陳瑾領之

隱志文作匿紀
文作簽今以易

領軍之人度之
則匿字為是

十六年四月諭揚州行省選南軍精

銳者二萬人充侍衛親軍併其家赴京師仍給行費

鈔萬六千錠十七年正月詔毋以侍衛軍供工匠役
二月發侍衛軍三千浚通州運糧河二十四年十月
總師汪惟和選麾下銳卒一千人請擇昆弟中一人
統之以備侍衛從之二十六年六月發侍衛軍二千
人濬袁諾爾河

武衛

至元二十五年尚書省奏諾海尼都以漢軍一萬人
如上都所立虎賁司營屯田修城隍二十六年樞密

院官安巴奏以六衛六千人塔喇海布格所掌大都屯田三千人及近路迤南萬戶府一千人總一萬人立武衛親軍都指揮使司掌修治城隍及京師內外工役之事至泰定帝二年六月勅營造母後五衛軍士止以武衛虎賁二衛給之

臣等謹按武衛世祖初本有之此則二十六年所別立者也志中所載二十五年如上都所立虎賁司一事未見明晰叅之泰定紀文始知二衛供營

造之役居多耳

桂齊軍

至元十三年詔民之蕩析離居及僧道漏籍諸色人
不當差徭者萬餘人充桂齊軍令明安領之至二十
四年立桂齊衛置親軍都指揮使司

臣等謹按志云二十四年立衛而明安傳云二十
年明安為中衛都指揮明年領桂齊軍北征又明
年立桂齊親軍都指揮使司則當為二十二年

分小有異同未為大舛但志中止云二十四年立衛而不叙明立軍之始則疎矣

隆福宮左都威衛

初至元十六年世祖以新取到侍衛親軍一萬戶屬之東宮立侍衛親軍都指揮使司三十一年復以屬皇太后改隆福宮左都威衛使司武宗至大三年選其軍之善造作者八百人立千戶所一及百戶翼八以掌之而分局造作仁宗皇慶元年以王平章舊所

領軍一千人立屯田英宗至治三年罷匠軍千戶所
隆福宮右都威衛

國初穆呼哩奉太祖命收扎拉爾烏嚕蒙古諾海四
投下以安扎爾博囉實訥岱伯爾克巴圖爾庫庫布
哈五人領特默齊軍既平金隨處鎮守世祖中統三
年以五投下特默齊立蒙古特默齊總管府至元十
六年罷其軍各於本投下應役十九年仍令充軍二
十一年樞密院奏以五投下特默齊軍俱屬之東宮

復置官屬如舊二十二年改蒙古侍衛親軍指揮使司三十一年改隆福宮右都威衛使司

唐古衛

至元十八年阿實克烏蘇言今年春命總領河西軍三千人其帶虎符金牌者甚衆征伐之重若無官署何以防閑之樞密院以聞遂立唐古衛親軍都指揮使司以總之成宗大德元年十一月籍唐古軍入樞密院

西域親軍

成宗元貞元年依桂齊唐古二衛例立西域親軍指

揮使司

右阿蘇衛左阿蘇衛

至元九年初立阿蘇巴圖達嚕噶齊後招集阿蘇正

軍三千餘名復還阿蘇齊克齊拉衮集賽台軍七

百人扈從車駕掌宿衛城禁兼管潮河蘇沽兩川屯

田并供給軍儲二十三年為阿蘇軍南攻鎮巢殘傷

者衆遂以鎮巢七百戶屬之并前軍總為一萬戶隸
前後二衛武宗至大二年始改立右左衛阿蘇親軍
都指揮使司

隆鎮衛

睿宗在潛邸嘗於居庸闕立南北口屯軍徼巡盜賊
各設千戶所至元二十五年以南北口上千戶所總
領之至大四年改萬戶府分欽察唐古桂齊西域左
右阿蘇諸衛軍三千人并南北口大和嶺舊隘漢軍

六百九十三人屯駐東西四十三處立十千戶所置
隆鎮上萬戶府以統之皇慶元年始改為隆鎮衛親
軍都指揮使司延祐二年又以哈喇婁軍千戶所隸
焉至治元年置蒙古漢軍籍

左衛率府

武宗至大元年命以中衛兵萬人立衛率府屬之東
宮時仁宗為皇太子曰世祖立五衛象五方也其制
猶中書之六部殆不可易遂命江南行省萬戶府選

漢軍之精銳者一萬人為東官衛兵立衛率府仁宗
延祐元年改為忠翊府未幾又改為御臨親軍都指
揮使司復以御臨非古典改為羽林六年英宗立為
皇太子復以隸東官仍為左衛率府

臣等謹按武宗紀云勅知樞密院事特穆爾布哈
摘漢軍萬人為皇太子別立衛不云江南行省以
志參之想所摘乃江南行省萬戶府之兵也

右衛率府

至大二年八月又置太子右衛率府命右丞相托克
托御史大夫布琳尼敦領府事至仁宗延祐五年以
詹事圖們岱爾所管薩勒奇諾爾萬戶府及迤東女
直兩萬戶府右翼屯田萬戶府兵合為右衛率隸皇
太子位下

王約傳曰仁宗在東宮約為詹事丞時詔立左衛
率府摘侍衛軍萬人為東宮衛兵同列欲署軍官
約持不可仁宗召問對曰皇太子事不敢不為天

子事不敢為仁宗悟竟罷其議同列復傳命增立
右衛率府取河南蒙古軍萬人隸之約屏人語曰
左衛率府舊制所有今置右府何為諸公宜深思
之不可累儲君也又命取安西兵器給宿衛士約
謂詹事鄂勒哲曰詹事移文數千里取兵器人必
驚疑主上聞之奈何鄂勒哲愧曰實慮不及此

臣等謹按兵志止書延祐五年事而武宗事失載
今依紀叙其始置之由又延祐五年二月紀書以

扎蘭齊喇萬戶府為右衛率府至六年七月又書
以扎蘭齊喇萬戶府軍萬人隸東官置右衛率府
一事兩見扎蘭齊喇與志中薩勒奇諾爾字不相
符不知孰是

康禮衛

至大三年定康禮軍籍凡非康禮氏者皆別而黜之
驗其實始得入籍及諸侯王阿濟格呼魯蘇所領特
默齊屬喀喇氏者令樞密院喀喇衛遣人乘傳往置

籍馬

臣等謹按此據兵志宿衛門內所載書之也叅之紀文是年正月汰廣武康里衛軍非其種者還之原籍凡隸諸王阿濟格呼魯蘇及迤南特默齊者令樞密院遣人即其處叅定為籍較志文多廣武迤南四字餘意皆同以遣人乘傳即其處定籍之語度之疑其非在京師也但元時郡國之兵止有鎮戍無名某衛者故此亦為宿衛耳

中都威衛後改忠翊侍衛

初世祖至元二十九年立屯田府成宗大德十一年
增軍數立為大同等處侍衛親軍都指揮使司武宗
至大四年皇太后修五臺寺遂移屬徽政院并以京
兆軍三千人增入仁宗延祐元年改中都威衛使司
仍隸徽政院延祐七年六月時英宗已即位以紅城中都威
衛係掌軍務之司屬徽政院不便命遵舊制俾樞密
總之志中以紅城中都威衛一條另叙不在忠翊
侍衛條下今按止多紅城二字必即一事也英

宗至治元年改為忠翊侍衛親都指揮使司

宗仁衛

英宗至治二年右丞相拜珠奏以先圖卜特穆爾叛時沒入伊奇喇斯人一百戶與今所收蒙古子女三

千戶清州徹匠二千戶合為行軍五千請立宗仁衛

遂置宗仁衛蒙古侍衛親軍都指揮使司即命拜珠

總衛事如右衛率府又置行軍千戶所隸焉

紀文書
調各衛

漢軍二千充宗
仁衛屯田卒

至泰定帝元年四月罷衛士四百人

還宗仁衛

其先分出四百人之事無可考

右欽察衛左欽察衛

世祖至元二十二年籍民丁為兵得萬人以伊蘇岱爾為欽察親軍指揮使統之二十三年依河西等衛例立欽察衛設行軍千戶十有九所屯田三所成宗大德中置濟爾噶朗特古納兩千戶所武宗至大元年復設四千戶所英宗至治二年以欽察衛士多為千戶所者凡三十五故分為左右兩衛文宗天歷二

年與龍翊衛同屬大都督府以太平王雅克特穆爾
兼統之

臣等謹按欽察之分左右志云至治二年之事叅
之英宗紀係是年二月分置命拜珠總之乃文宗
紀至順二年三月又書以欽察衛軍士增多析為
左右二衛其誤明矣

龍翊侍衛

文宗天歷元年十二月立龍翊衛親軍都指揮使司

析左欽察衛騰吉斯等九十戶隸焉命太平王雅克
特穆爾領其事

虎賁親軍都指揮使司

臣等謹按虎賁軍志中止列其名考之紀文惟武
宗至大二年三月摘五衛軍五十人隸中都虎賁
司及前武衛條下泰定二年勅給營造之役二事
而已

左珣蒙古侍衛親軍都指揮使司

右翊蒙古侍衛親軍都指揮使司

宣忠俄羅斯扈衛親軍都指揮使司

初名宣忠扈衛親軍萬戶府文宗至順二年四月改名宣忠俄羅斯扈衛親軍都指揮使司

威武阿蘇衛親軍都指揮使司

東路蒙古侍衛親軍都指揮使司

女直侍衛親軍萬戶府

高麗女直漢軍萬戶府管女直侍衛親軍萬戶府

臣等謹按元代尚海運此軍之制雖無可詳考大約為海運而設以其守海口且有屯儲之責故也

宣鎮侍衛

臣等謹按左右中前後五衛武衛左翼右翼忠翊左右欽察左衛率府宗仁衛宣忠扈衛虎賁司各有屯田之制具詳田賦考

圍宿衛

世祖至元二十六年命大都侍衛親軍內發萬人赴

上都備圍宿成宗元貞二年樞密院臣言昔大朝會時皇城外皆無牆垣故用軍環繞以備圍宿今牆垣已成臣等議各城門以蒙古軍列衛及於周橋南置戍樓以警昏旦從之武宗至大四年正月皇太子命以大朝會調蒙古漢軍三萬人備圍宿仁宗皇慶元年六月命衛率府軍士備圍宿守隆福宮內外禁門十一月又以皇太后旨嚴禁掖門守衛增置百戶一員及於欽察桂齊西域唐古阿蘇等衛調九十人增

守諸掖門復命千戶一員帥領百戶一員備巡邏延祐三年十月以諸侯王來朝命圍宿軍士六千人增至萬人十一月詔除舊有者更增色目軍萬人

臣等謹按志稱大朝會則用圍宿軍蓋元代諸侯王各統兵權其入而朝會亦必有隨行軍士故朝廷用圍宿軍以備之自圍宿軍以下諸軍皆無定制即取之各衛中以應其役大約事畢或即散歸也志中所書僅擇其稍似立制度者載之餘不備

錄又圍宿與巡邏互相為助如皇慶元年十一月之事是也又考世祖中統元年諭隨路管軍萬戶有舊從萬戶三哥西征軍人悉遣至京師充防城軍一條此則想因用兵之時故調合之以壯京師並非常設之制且其事止一見故附志於此

儀仗軍

又有名蹕街清路軍又有看靛盆軍

或作看守靛盆軍

皆行

祭祀典禮時所用

世祖至元十二年上尊號告祭天地宗廟調左右中
三衛軍五千人為蹕街清路軍武宗至大二年上尊
號行朝賀禮樞密院調軍一千人備儀仗三年上皇
太后尊號行冊寶禮用內外儀仗軍及防護五色甲
馬軍二百人四年二月合祭天地太廟社稷用蹕街
清路及守內外墻門軍百八十人命以圍宿軍為之
事畢還役英宗至治元年命有司選控鶴衛士及色
目漢軍備鹵簿儀仗定鹵簿隊仗用軍士二千三百

三十人萬戶千戶百戶四十五員仍議用軍士二十

九百五十人萬戶千戶百戶五十九員

按上二句所書疑是舊制

此二句則新議定之數但志中文未明晰

以備儀仗泰定帝致和元年六

月享太廟用蹕街清路軍一百名看覈盆軍一百名

扈從軍

世祖至元十七年三月發蒙古岱綽爾齊所領河西

軍士及額勒赫麾下二百人入備扈從十八年十二

月議選侍衛軍萬人練集備扈從成宗大德五年十

一月選六御

御字當是衙字之訛

扈從漢軍習武事仍禁萬戶

以下毋令私代犯者斷罪有差

看守軍

世祖至元二十五年十一月以軍守都城外倉初大都城內倉有軍守之至是城外豐閏豐實廣貯通濟四倉亦每倉發軍五人守之成宗大德四年調軍五百人於新浚河內看閘武宗至大四年發阿蘇唐古等軍叅漢軍用之各門置五十人仁宗延祐元年隆

禧院官言初世祖影殿有軍士守之今大崇恩福元寺有武宗御容宜依例調軍守衛從之英宗至治元年增守太廟牆垣軍初以衛士軍人共守圍宿故止用蒙古軍四百人至是以衛士守內牆垣其外墻止用軍士仍增至八百

巡邏軍

仁宗皇慶元年丞相特們德爾奏每歲既幸上京於各宿衛中留衛士三百七十人以備巡邏今歲多盜

宜增百人命樞密與中書分領之延祐七年五月詔
留守司及虎賁司官親率衆於夜巡邏

鎮過軍

仁宗延祐元年閏三月樞密院官言江浙春運糧八
十三萬六千二百六十石取日開洋前來直沽請預
差軍人鎮過詔依年例調軍一千名三年以軍數不
敷止調五百人七年調海運鎮過軍一千如舊制

臣等謹按志中止載延祐時三條然其定制用一

千人可即此以推前後之制矣

鷹房捕獵

元制自御位及諸王皆有實保齊蓋鷹人也是故捕獵有戶使之致鮮食以薦宗廟供天庖而齒草羽毛又皆足以備用然地有禁取有時違者則罪之冬春之交天子或親幸近郊縱鷹隼搏擊以為遊豫之度設之飛放故鷹房捕獵皆有司存而打捕鷹房人戶多取析居放良及漏籍還俗僧道與凡曠役無賴者

及招收亡宋舊役等戶為之其差發除納地稅商稅
依例出軍等六色宣課外並免其雜泛差役自太宗
乙未年抄籍分屬御位下及諸王公主駙馬各投下
及世祖時行尚書省重定其籍厥後永為定制焉

臣等謹按鷹房捕獵兵志中載在卷末不與宿衛
諸軍並列然志中論集賽執事之名云掌鷹隼之
事者曰實保齊固即此軍人也此惟從天子狩獵
近在御前非古者期門佽飛之遺制歟雖諸王駙

馬皆得有之亦以國俗家法時當修講故臣下亦
得以肄武事而其職事之所重專在於率左右以
燕天子也今故採其制附書禁衛軍之後

欽定續文獻通考卷一百二十五

欽定四庫全書

欽定續文獻通考卷一百二十六

兵考

禁衛兵

明親軍上二十二衛

臣等謹按有明一代禁衛之制自太祖為吳王時始置金吾羽林等十衛洪武時有上十二衛而勲衛舍人在外永樂時增為上二十二衛而五軍神

樞二營之紅盔明甲將軍等在外宣德時以永樂時所集之勇士改為四衛皆為親軍又有皇城守衛官軍昉於洪武南京而北京之制定於永樂即以諸衛軍分地司之又有京城巡捕軍亦昉自洪永此則設專官為之即五城兵馬司也總而論之諸衛中惟錦衣衛以兵兼刑且與中官相羽翼故其權至後而積重四衛營亦以聽御馬監提調故亦稱要焉此外武功彭城諸衛及諸陵之衛兵志

雖亦列之親軍之後然皆不稱親軍今脩載兵志所列之三條於本門之首上十二衛則洪武時制也上二十二衛及其餘諸衛則自永樂而後歷朝之制也南京衛所親軍衛則既遷北京後而南京所存者也至歷朝一切制度則仍按年載之

舊制上十二衛金吾前衛金吾後衛羽林左衛羽林右衛府軍衛府軍左衛府軍右衛府軍前衛府軍後衛虎賁左衛錦衣衛旗手衛後增設金吾左衛金吾

右衛羽林前衛

以上北平三衛衛洪武三十五年升
按此書洪武三十五年乃成祖年

建文年間而仍稱洪武實
即永樂元年之前一年也燕山左衛燕山右衛燕山

前衛大興左衛濟陽衛濟川衛通州衛

舊為安吉衛
以上北平都

司七衛永
樂四年升為上二十二衛俱稱親軍指揮使司不屬

五府

又增設四衛及武功永清彭城諸衛長陵等衛

騰驤左衛騰驤右衛武驤左衛武驤右衛

以上四衛
宣德八年

以各衛養馬軍士父
神武前衛官軍開設

亦係親軍武功中衛

洪武年
間設武

功左衛

宣德二年設

武功右衛

宣德六年設

永清左衛 永清右

衛彭城衛

以上北平三衛改常山三護衛宣德初復為木衛又併河南三護衛多餘官軍於彭

城長陵衛

舊為南京羽林右衛永樂二十二年改

獻陵衛

舊為武成左衛宣德元年

改景陵衛

舊為武成右衛宣德十年改

裕陵衛

舊為武成前衛天順八年改

茂

陵衛

舊為武成後衛成化二十二年改

泰陵衛

舊為忠義左衛弘治十八年改

康陵

衛

舊為義勇中衛正德十六年改

永陵衛

舊為義勇左衛嘉靖二十七年改

昭陵衛

舊為神武後衛隆慶六年改

定陵衛 慶陵衛 德陵衛 奠靖千戶所

嘉靖二十一年設

犧牲千戶所

按志於定陵等三衛不載設立之年而奠靖千戶所下則

系以嘉靖二十一年之文至儀牲千戶所
但載屬太常寺轄而亦不紀其設立之年

南京衛所親軍衛

於舊上十二衛外又有金吾左衛金吾右衛江淮衛
濟川衛孝陵衛儀牲千戶所

洪武二年改拱衛司為親軍都尉府

先是吳元年十二月設拱衛司領校尉隸都督府至
是改為府統中左右前後五衛軍而儀鑾司隸焉

三年二月置留守五衛指揮司專守門巡警

先是丙申七月置帳前總制親兵都指揮使司省都鎮撫司兵馬指揮司至吳元年十月以省都鎮撫隸大都督府已改為留守司至是改置留守衛指揮司設左右前後中五衛每衛設指揮五員關領內府銅符日輪二人點守衛官軍夜亦如之

按上十二衛以衛宮禁留守五衛及在京諸衛共四十八衛以衛京城此洪武時南京之制

四年正月立內城門禁之法

守門指揮千百戶日一更代士卒三日一更代凡內
官內使出入皆用號牌若有以兵器雜藥到門者論
如律守門軍士失察者罪如之至二十七年十二月
帝諭凡守衛皇城四門自指揮至軍士各依其伍全
隊上直勿得代替違者處重刑因申定皇城門禁法
凡朝叅門始啟直日都督將軍及應直帶刀官入後
百官始以次入上直軍三日一更番於朝退辰時交
代凡內臣出入必合符嚴索以金幣出者驗視勘合

以兵器雜藥入者擒治之失察者重罪凡官軍人民
有事陳奏不許阻遏及問其事情違者罪之

五年正月置親王護衛指揮使司

每府三護衛衛設左右中前後五所所千戶二百戶
十設圍子手所二所千戶一

邱濬大學衍義補曰昔人謂侯國之兵既屬之郡
而王國之兵亦天子之所有皆所以防微杜漸以
尊京師也明於親藩皆設護衛然惟給其使令而

不許其調遣遇國家有事亦起焉亦防微杜漸以尊京師之意

六年五月改扈駕先鋒金字銀牌為守衛金牌

先是命工部造銀牌釵駕前先鋒四字以金塗之尋改為守衛金牌銅塗金為之高一尺濶三寸以仁義禮智信為號仁字號釵獨龍盤雲花公侯伯都督佩之義字號釵伏龍盤雲花指揮佩之禮字號釵獬豸盤雲花千戶衛鎮撫佩之智字號釵獅子盤雲花百

戶所鎮撫佩之信字號釵盤雲花將軍佩之二面俱有篆文一曰守衛一曰隨駕守衛官員懸帶此牌直宿不許借掛首為圓竅貫以青絲絛掌於尚寶司凡隨駕應直宿衛者許闕給佩帶下直則納之

九年正月以勲臣子弟有才者置勲衛散騎舍人

詔都督府擇公侯伯都督及各衛所指揮嫡長子才可試用者為之佩弓刀充宿衛

十月金吾右衛指揮同知袁義等進大駕出入侍衛布

列圖

凡隨駕之兵各依隊伍布列騎兵百戶則領執盾之
卒侍衛指揮列於執盾者之前應有祭祀及臨幸之
處雖大臣不許往來其侍衛官員無兵仗者亦不得
輒至侍從大臣皆列兵士之後若有宣召許由道左
右以進其扈從蓋扇兩旁或值衢巷恐有衝突各設
八尺短兵五枝以衛至如內官離駕後一十五丈隨
行詔令內官有職事者稍近後行無職事者旁行勿

居兵衛之中

十二年四月遣使於浙江諸府募民為校尉

先是校尉力士之設僉民間丁壯無疾病過犯者為
之力士隸旗手千戶所專領金鼓旗幟隨駕出入及
守衛四門校尉隸拱衛司專職擎執鹵簿儀仗及駕
前宣召官員差遣幹辦三日一更直至是以隸儀鑾
司特詔募民為之後罷司置錦衣衛亦罷旗手千戶
所置旗手衛

十三年三月以京衛軍士充公侯儀仗戶

韓國公李善長魏國公徐達二十戶曹國公李文忠等十九戶侯十五戶先是以京民充之至是命易以軍士後至二十三年六月置公侯伯屯戍百戶給以鍊冊初帝以公侯伯有大勲勞人賜卒百二十人為從者曰奴軍及其年老還鄉命設百戶一人統衆衛之俾屯戍以食賜以鍊冊給以印侯其子孫承襲則罷之時謂鍊冊軍

臣等謹按帝作鐵榜申戒公侯其一凡指揮以下不得私受公侯金帛衣服錢物其二凡公侯等官非奉特旨不得私役官軍其四凡內外各衛官軍非當出征之時不得輒於公侯門首侍立聽候違者至死或戍烟瘴其防閑之意至矣此則奉特賜者歟

十五年四月改置錦衣衛

初設拱衛司後改親軍都尉府隸以儀鑾司至是罷

府及司置錦衣親軍指揮使司所屬有南北鎮撫司
十四所南司理衛中刑名如列衛而兼簡軍匠北司
專理詔獄所隸有將軍力士校尉其掌職直駕侍衛
巡察捕緝等事錦衣所隸將軍選豐偉有勇者為之
號曰天武將軍凡朝及宿衛扈駕俱執金瓜披鐵甲
佩弓矢冠紅纓鐵盔列侍左右如大朝會則金甲金
盔侍殿庭初隸拱衛司至是隸錦衣衛改稱大漢將
軍凡千五百人設千百戶總旗七員以積勞遞升許

以子弟襲無則選民戶充之其衆自為一軍下直操

練如制

按王圻本此亦自稱為將軍營

永樂中置五軍三千營增紅

盔明甲二將軍及义刀圍子手之属脩宿衛校尉力士俱以民間丁壯充力士先隸旗手衛至是改隸錦衣衛及後宣德時亦属騰驤等四衛專領隨駕金鼓旗幟及守衛四門校尉先隸儀鑾司司改錦衣衛仍隸焉掌擎執鹵簿儀仗曰鑾輿曰擎盖曰扇手曰旌節曰幡幢曰班劍曰斧鉞曰戈戟曰弓矢曰馴馬凡

十司及駕前宣召差遣三日一更直設摠旗小旗而領以勛戚官官凡六管大漢將軍及散騎舍人府軍前衛帶刀官者一管五軍營義刀圍子手者一管神

樞營

即三千營也
世宗時改

紅廬將軍者四凡大節大典用全

直直三千人餘則更番居常當直將軍朝夕分候午門外夜則司更共百人而五軍義刀官軍悉於皇城直宿掌侍衛官輪直日一員惟掌錦衣衛將軍及義刀手者每日侍尤嚴收捕之令及諸脫更離直者共

計錦衣衛大漢將軍一千五百七人府軍前衛帶刀
官四十神樞營紅盔將軍二千五百把總指揮十六
翼甲將軍五百二把總指揮二大漢將軍八五軍營
之刀圍子手三千把總指揮八勲衛散騎舍人無定
員旗手等衛帶刀官一百八十此侍衛將軍大較也
兵志曰太祖之設錦衣也專司鹵簿是時方用重
刑有罪者往往下錦衣衛鞠實本衛叅刑獄自此
始文皇立倚錦衣為心腹所屬兩鎮撫司凡問刑

奏請皆自達不關白衛帥用法深刻為禍甚烈又
錦衣緝民間情偽以印官奉勅領官校東廠太監
緝事別領官校亦從本衛撥給因是恒與中官相
表裏皇城守衛用二十二衛卒不獨錦衣軍而門
禁亦上直中事京城巡捕有專官然每令錦衣官
協同地親權要遂終明之世云

春明夢餘錄曰錦衣衛堂上官每駕出則戎裝帶
繡春刀扈從繡春刀極小然非上賜則不敢佩

臣等謹按以上所采皆摠明全代言之不專在洪武時也

二十八年九月命衛所鎮撫發夜巡銅牌

初置兵馬司夜發巡牌旗士領之覈城門扃鑰及夜行者至是改命衛所鎮撫官每夜鎮撫一員發牌分鎖二員領軍旗巡警而掌於中軍都督府

成祖永樂元年二月設北京兵馬指揮司

至七年八月增五城兵馬司

臣等謹按兵馬司洪武時南京已設王圻續通考
曰建文元年二月改為五城兵馬司永樂元年定
為中東西南北城兵馬司殆不足據

七年鑄北京皇城四門銅符及夜巡銅牌

八年摘諸衛軍為營選其魁大者同將軍侍衛

時帝北征調諸衛官軍俱集命每衛摘三五人或六
七人計一千二百人為一營屬神機營兼統之復選
其魁大者令同將軍捧刀侍衛遂謂之千二營至宣

德中大臣言此在外官軍常於內府出入不便乃罷遣還衛

十三年四月立府軍前衛親軍指揮使司

先是帝以皇太孫年長有智略欲令習武事命選民間子弟年十七至二十勇健有才藝者送京師俾充隨從謂之幼軍至是立衛所置官屬至宣德八年二月選京衛武職舍人及見操幼官舍人餘丁以脩東宮隨侍尋命選幼軍萬人隨侍皇太子

定諸衛軍守衛分地頒銅符

皇城四門各衛官軍分守有分定地方自午門達承
天門左右逮長安左右門至皇城東西屬旗手濟陽
濟川府軍及虎賁右金吾前燕山前羽林前八衛東
華門左右至東安門左右屬金吾羽林府軍燕山四
左衛西華門左右至西安門左右屬四右衛元武門
左右至北安門左右屬金吾府軍後及通州大興四
衛凡各門守衛官照依地方各領銅符收掌守衛其

符頌自太祖曰承曰東曰西曰北各以其門名巡者
左半守者右半守官遇巡官至合契而從事又各門
守衛官遇夜各領銅令申字牌齎執巡警自一至十
六日直都督及帶刀千百戶一員領十七號令牌於
內直宿仍點各門軍士後更定都督府改命僉書侯
伯輪直內皇城四圍衛舍四十設銅鈴四十一外皇
城衛舍七十二設銅鈴七十八次第循環內皇城左右
坐更將軍百人每更二十人四門設走更官八員交

互往來鈐印於籍以為驗

臣等謹按兵志云永樂中定制無年月故附於末銅符之制既頒自太祖大抵遷都之後因舊制而申定之者也

仁宗洪熙初更造衛士懸牌

臣等謹按造懸牌之制史志云洪熙初事考實錄則係永樂二十二年十一月仁宗初即位而未改元時事也先是守衛軍但懸木牌至是更以銅一

面文曰凡守衛官軍懸帶此牌無牌者依律論罪
借者及與者罪同一面守衛二字其守衛官並懸
本職牙牌

元年四月以京衛軍助親軍守衛

先是南京留守五衛官軍皆先調其半於北京分守
城門至是始以其軍改設衛所時親軍缺伍衛士不
獲代帝命選散衛軍之精壯者助親軍守衛親軍專
守皇城四門京衛軍助守端門之外及東直等門尚

書李慶謂非舊制且散衛軍不可盡信帝曰人主在布德以屬人心苟心相屬雖非親信何患焉

宣宗宣德三年十一月命御史點閱衛卒

時四門官軍玩法作弊帝命都御史顧佐嚴禁之常以御史一員往來四門巡察著為令至五年十二月又命科道官點守衛軍士先是取外衛帶操軍士萬人分隸親軍專令守衛上直往往有逃者違例別差及私役者故命科道及守門內臣點之後至英宗正

統四年十月以門禁不嚴命御史每日點視守衛官
軍天順中復增給事中一人

四年二月選幼官指揮千戶分番佩刀入直

是年七月金吾衛指揮擅收將軍帶刀上直帝以將
軍侍左右最係切要之人非經兵部奏請而擅收嚴
治其罪

八年七月設武驤左右騰驤左右四衛實以御馬監養
馬勇士

初永樂時以迤北逃回軍士供養馬役給糧授室號
曰勇士後多以進馬者充而聽御馬監官提調名隸
羽林身不隸也名姓多同量支糧賞莫可稽考宣德
六年十二月乃專設羽林三千戶所統之凡三千一
百餘人至是改武驤騰驤左右衛稱四衛軍選本衛
官四員為坐營指揮督以太監別營開操稱禁兵器
械衣甲異他軍橫於輦下

臣等謹按逃回軍士明史言永樂時明史稿則云

宣宗初有馬貴等三十餘人自迤北逃回用以養馬與明史不符

英宗正統元年三月改守衛內外諸衛官軍為京衛五軍都督府言守衛諸軍係內外四十衛官軍衛所繁多無衙門印信公文難以稽考請併入上二十衛收伍仍令直守從之

臣等謹按洪熙初以親軍不足選散衛軍助之守衛茲之併入者是已

憲宗成化四年四月命錦衣衛官同御史督京城巡捕
軍

時城內外多盜給事中陳鶴請勅錦衣衛多發旗校
分管各城每城設千百戶二員總以指揮輪替分守
定為賞罰命所司參酌行之六月錦衣衛官及巡城
御史胡靖等言京城之外四路截路強盜多係騎馬
官軍步行不能追捕宜於四路各差千百戶一員率
領馬軍三四十名分為二班輪流巡視從之至末年

撥團營軍二百增給之

臣等謹按此為御史分地巡城之初制以前則命點閱衛卒而已

孝宗弘治元年令三千營選指揮以下四員領精騎巡京城外又令錦衣官五旗手等衛官各一分地巡警巡軍給牌

五年設把總都指揮專職巡捕

後至正德中添設把總分畫京城外地南抵海子北

抵居庸關西抵盧溝橋東抵通州復增城內二員而益以團營軍定官卒賞罰例末年邏卒增至四千人六年十二月令兵部主事每月點視門卒

京城九門守衛軍卒籍禁甚嚴成化中門卒往往納賂門官因縱免名曰辦納月錢乃令科道及兵部官各一員巡視至是止留兵部主事一員每月二次點視而不遣科道官蓋從內官陳良等奏也

臣等謹按是時承平日久法禁日弛守門內官數

多軍士占役殆盡九年九月兵部言每門守視軍士原二百餘人近以私役者多止有老弱五六十人頃歲盜自正陽門越城而出近日黑熊上西直門門禁廢弛一至於此乞嚴點閱仍減內臣孝宗悉允行之

武宗正德元年八月兵部請嚴進充勇士之禁

先是孝宗命汰勇士後兵部言詭冒食糧者一萬三千九百有奇宜除其名籍武宗即位中官甯瑾乞留

所汰人數言官及尚書劉大夏持不可不聽至是尚書許進言勇士名為養馬實為禁兵近進克者五百五十人其中尚多年五六歲者每歲月糧為六千六百石而冬衣不與焉即今災異頻仍倉儲告乏可復啟濫收之門而增坐耗之蠹乎望俱裁革或勅御馬監內官會同本部從公閱其年貌膂力堪養馬操練者量留之

臣等謹按陳奏雖如此而帝終不聽也後兩官廳

立遂選四衛勇士隸西官廳掌以邊將內官

二年十月收錦衣衛餘丁五千人充軍役

指揮同知高得林奏本衛五所旗校及七所鎮撫司
軍士數少乞以戶內餘丁收充軍役五千人帝從之
蓋自有收充之請而坐食之蠹日滋矣

兵志曰自正統後妃主公侯中貴子弟授官者多
寄祿錦衣中正德時奏帶傳升冒銜者又不下數
百人武宗好養勇士嘗以千把總四十七人注錦

衣衛帶俸舍餘丁一千人充御馬監家將勇士食糧騎操又令大漢將軍試百戶五年實授著為令俸實開而思澤濫宿衛稍輕矣

四年二月增夜巡查點守鋪官軍指揮二員為五員

臣等謹按兵志言正德初嚴皇城紅鋪巡徼日令留守衛指揮五員督內外夜巡軍而兵部郎中主事各一人同御史錦衣衛稽閱毋攝他務當即實錄所書此年增二員為五員時事也

十六年五月

時世宗
已即位

增京城內外巡捕馬軍設叅將領

之

舊制設官軍三千六百餘員名巡邏京城內外地界
廣遠乏官專領又汰草海戶及詭冒軍匠人等相聚
為盜於是兵部請添設官軍凡增官軍四千員名又
於內揀選精銳五百員名立為尖哨加給行糧以署
右都督桂勇充叅將督領之由是盜賊屏戢至二年
九月掣新添兵回營以其壯勇補原額官軍四年四

月桂勇言西山一帶依山險阻奸民相率為盜宜編立鄉兵略如保甲之法令相守望度地之中設巡捕分署委官駐劄從之

臣等謹按兵志於正德末言增邏卒至四千人特置叅將即所謂舊制三千六百餘員名也今據世宗實錄則置叅將乃世宗初政非武宗末年事又兵志言嘉靖元年復增城外把總一員并舊為五分轄城內東西二路城外西南東南東北三路增

營兵為五千又選十之一立尖哨五百騎厚其月
糈命叅將督操而監以兵部郎與此所采實錄會
典諸書大同而小異

世宗初即位詔四衛營勇士自弘治十八年存額外悉
裁之

時帝入立有此詔凡勇士替補必兵部查駁而御馬
監之馬令科道巡覈既而中旨免覈馬多虛增

按史
言馬

增者蓋馬增則養
馬之士亦必增也後數年御馬太監閔洪矯旨選四

衛官為言官所劾不報久之兵部尚書李承勛請以
選覈仍隸本部中官謂非便帝從承勛言至嘉靖十
六年又命收復登極詔書所裁者凡四千人後五年
內臣言勇士僅存五千餘請令子姪充選以脩邊警
部臣言故額定五千三百三十人八年清稽已浮其
數且此營本非為脩邊設者帝從其議然隱射占役
冒糧諸弊率如故

嘉靖三十三年六月詔籍京師召募民兵充巡捕軍

初庚戌變後詔募民兵四千為一營設叅將領之於西教場操練防禦京師至是逃者千餘人兵部議老弱裁汰所餘精壯不敷一營以充京營巡捕從之

臣等謹按庚戌之變謂二十九年諳達入寇之事也

神宗萬厯二年減四衛營坐營官二員

已復定營官缺由兵部擇用其後復為中官所撓仍屬御馬監廷臣多以為言不能從後至四十二年給

事中姚宗文點閱本營言官勇三千六百四十七僅
及其半馬一千四十三則無至者官旗七千二百四
十止四千六百餘馬亦如之乞下法司究治帝不能
問

十一年於皇城內外設把總二員分東西管理

臣等謹按此乃皇城守衛官軍之制也史言時門
禁益弛諸衛軍役於中官每至空伍賃市兒行丐
應點閱叉刀紅盔日出始一入直直廬虛無人坐

更將軍皆納月鏹於所轄凡提號巡城印簿走更
諸事悉廢蓋明自神宗而後其叢脞不可言矣中
外多故迨至啓禎兩朝雖屢申飭究莫能挽侵尋
以至於亡

十二年定京城內外捕盜責成

凡有盜發自卯至申責成兵馬司自酉至寅責成巡
捕營賊衆則協力捕勦至崇禎時以兵部左侍郎專
督捕之務歲舉劾捕營將領以下汰選捕軍而以盜

之有無賞罰焉然玩法卒如故

四十六年六月覈定內外守門軍士

尚書薛三才言十六門原額軍六千八百餘名自添
內監提督逐門占役至四千三百餘名乞委官清理
掣回詔允之已而兵部言守門軍士實在五千八百
七名宜委主事一員管理并揀選指揮千百戶以嚴
統率再於京營調取把總八員分委查點從之

愍帝時改四衛營為勇衛營

先是天啓時巡視御史高弘圖請視三大營例分弓
弩短兵火器加以訓練至是允提督內臣曹化淳奏
改為勇衛營以周遇吉黃得功為帥遂成勁旅出擊
流賊輒有功得功軍士畫虎頭於皂布以衣甲賊望
見黑虎頭軍多走避其得力出京營上云

臣等謹按黃得功傳崇禎九年遷副總兵分管京
衛營則改營名當亦在是年也

欽定續文獻通考卷一百二十六